

# INUIT ATAQATIGIIT INATSIARTUNI



UPA2023/18

25.09.24.

Peter Olsen

**Uunga siunnersuut Kalaallit Nunaanni aningaasanik nuussinermi paasissutissat ilanngullugit nassiunneqartarnissaannik inatsisip allangortinneqarnissaa pillugu inatsisissatut siunnersuut.**

(Aningaasaqarnermut Akileraartarnermullu Naalakkersuisoq)

## **Oqaaseqaat:**

Inuit Ataqatigiinniit sulluuniit pinerlunniarnerit, peqquserlunniarnerit, inatsisinillu unioqqutitsilluni sulluuniit iliuuserineqartut, taakkulu aqputigalugit inuttut imminut, suliffeqarfittut, suliniaqatigiiffittut, peqatigiiffittut kattuffittulluuniit imminut iluaqusersorniarnarit akuerinngilagut aamma akuerinngisaannassavagut. Pinerlunniarnerit, peqquserluuteqarnianerit, inatsisinillu unioqqutitsinerit sulluuniit tamaasa pitsaaliorniarlugit akiuiniarniarlugillu sulissuteqarnianerit sulluuniit tamaasa Inuit Ataqatigiit suleqataaffigissavagut peqataaffigissavagullu.

Ukiuni kingullerni ajoraluartumik nunatsinni ikiaroonartumik tuniniaaneq aqputigalugu nunatsinni aningaasarpassuarnik isaatitsisoqarlunilu nunatsinniit aniatitsisoqarpoq. Minnerunngitsumillu nunarsuatta sinnerani nunat assigiinngitsut, inuiaat assigiinngitsut, ilaatigut sumiuussuseq kinaassuseq aammalu upperisaq aqputigalugu imminnut sorsuullutillu toqoraallutik pileruttorneranni peqqarniisaarniarnerit tusarsaagaluttuinnarput annertusigaluttuinnarlutillu.

Peqquserlunnerit, peqqaarniisarniarnerillu sulluuniit tamaasa sumiikkaluarpataluuniit Inuit Ataqatigiinniit akuerinngilagut aamma pinaveersaartillugillu akiorniartuartariaqarpagut.

# INUIT ATAQATIGIIT INATSIARTUNI



Tamaaattumik naatsumik oqaatigalugu Naalakkersuisut peqquserlunnerit, peqqarniisarniarnerillu aqqutigalugit imminut iluaqusersorniarnierit pinaveersaartitsiniarlutik iliuseqarniarnerat Inuit Ataqatigiinnit tunuliaqutserlugu tapersersussagatsigu oqaatigeriissavarput.

Malittarisassani maanna kryptonik kiffartuussisut pigisanik nalilinnik kryptonik nuussinerat ilaatilerlugu annertusineqarnerat, aningaasanik nuussinermi peqqussutit pingajuanni nutaartaavoq. Tassa illuatungeriit pigisanik nalilinnik kryptonik niuerfinnik ingerlatsisut, toqqortaqtut allallu kryptonik pigisaannik nalilinnik ingerlaatsisut imaluunniit kryptonik pigisanik nalilinnik aningaasanillu allanik imaluunniit kryptonik pigisanik nalilinnik ingerlatsisut, siunissami malittarisassanut ilaatinneqalissapput. Aningaasanik nuussinermi peqqussut nunani EU-mut ilaasortani ulloq 30. december 2024 atuutilissaaq.

Ilanngullugu oqaatigineqarpoq una inatsimmut allannguutissatut saqqummiunneqartoq akuerineqanngippat, tamanna uagutsinnut aningaaserivinnik atuisuusunut pitsaanngitsumik kinguneqarsinnaasoq allaat atuisuunerput pisariunerulersinnaalluni. Soorunami tamanna Inuit Ataqatigiinniit kissaatiginngilarput.

Inatsimmut allannguutissatut una siunnersuut tusarniuussutigineqarsimavoq. Tusarniaagivineqartullu ataasinnguulluunniit oqaaseqarfigisimanngilaat. Tamanna naatsumik oqaatigalugu uangga inatsimmut allannguutissatut siunnersuummut tapersiinertut isigineqarsinnaasutut Inuit Ataqatigiinnit isigaarput. Taamaattumik....

Taamatut oqaaseqarluta inatsimmut allannguutissatut siunnersuut akuersaarlugu aningaasaqarnermut akileraartarnermullu ataatsimiititaliamut ingerlateqqipparput.